

Fêtes de Wallonie 2022

Messe en Wallon

Lundi 19 septembre
à 10h00



Comité
Central
Wallonie

FETES DE WALLONIE
Lundi 19 septembre 2022

Église Saint-Loup

MESSE EN WALLON

En mémoire des Combattants
de 1830, 1914-1918 et 1940-1945

Pour la 8^{ème} fois consécutive,
cette messe sera célébrée par
Monsieur l'Abbé Bernard Van Vynckt

Avec la participation de :

La Musique Royale de la Police de Namur Capitale
sous la direction de Monsieur Pierre BODART et
Francis CHARLES

François-Xavier GRANDJEAN - organiste

Chorale Royale des Chanteurs du Rail sous la direction
de Madame Céline REMY

Lectrices : Mmes Nathalie POUSSIERE, Myriam
SPRUMONT

Adaptation : M. Joseph DEWEZ, des Rêlis Namurwès –
Bernard VAN VYNCKT

COMITE CENTRAL DE WALLONIE DE NAMUR
Rue des Brasseurs, 148-5000 NAMUR
ccw@skynet.be - www.fetesdewallonie.be

**MESSE EN WALLON
FÊTES DE WALLONIE 2022**

Divant d'comincî :

LA VITA E BELLA (N.PIOVANI)

OUVÊTURE

« Marche de la Police de Namur »

LI VÎ CLOTCHÎ D' SINT-DJAN

Paroles: Louis LOISEAU

Musique: Ernest Montellier

RIFRIN:(bis)

Gn-a l' tièsse qui bat l' bèrloque
On a l' keûr tot tron.nant
Quand on ètind l' grosse cloque
Do vî clotchî d' Sint-Djan

SOWAÎTS D' BINV'NÛWE do Comité Central di Walonîye

Mès djins,

Vo-nos-là cor on côp è l'èglîje Sint Leup po l' londi d' nos Fiesses di Walonîye ! Come nos-ôtes tortos, li Bon Diè è-st-al fièsse èt nos sowaîtî l' binv'nûwe avou l' Comité Central qu'èst tot binauje èto, on l' veut bin su tos lès visadjès ! èt nos dîrans nos pâters tortos èchone.

Asteûre, dji vôreûve dîre on fèl mèrci al Chorale dès Tchanteûs do Rail, al parotche di sint Leup, à totes lès soces dès-ancyins combatants. On fèl mèrci èto à Canal C... Mâria Dèyî, on n' dit pus Canal C asteûre, maîs Bouké : dji n' m'î faî nin, mi. Mèrci à Bouké di fé viker nosse mèsse dins branmint dès maujones d'amon nos-ôtes èt co pus lon !

Cite anéye-ci, nosse mèsse di Walonîye fièstéye sès-ans. Come tos l's-ans bin sûr! Maîs cite anéye-ci, c'è-st-one miète à paurt pace qu' èlle a sèptante ans. On fameûs bay! Oyi, mès djins, c'è-st-è mile noûf cint cinquante deûs qui Joseph Calozet, li Nèsse Montellier èt l' Pére Jean Guillaume

ont-st-i trové Monsègneûr Charue po lî d'mander d' p'lu causer è walon dans one èglîje, po lès fièsses di Walonîye; èt l'èvèque n'a nin balziné, il l'zî a rèspondu ossi rwèd, èt è walon vos-ôtes!, : "Poqwè nin!". Dispeûy adon, tos lès londis d' Walonîye, on cause nosse bia lingagdje li pus sovint dins l'èglîje di Sint Djan, èt quand ç' n'èst nin possibe, à Sint Nicolès ou à Sint Leup, comme audjoûrdu!

Dispeûy quausu cints-ans, lès Fièsses di Walonîye rindenut bon d'vwêr à tos lès soûdards dès guêres di quatôze èt d' quarante. Quand François Bovesse et Joseph Calozet ont mètu su pîd nos Fièsses, c'èsteûve po s' sovenu d' tos lès cias qu'ont disfindu nosse payis èt l' libèrté ! C'èsteûve èto po fé l' fièsse ca ça fait si télemint do bin d' yèsse tortos èchone èt di s' copler. Audjoûrdu, c'èst l'Ukrin.ne qui disfind s' libèrté, èt l' nosse : priyans l' Bon Diè qu'i n' lès rovîye nin !

Tos l's-ans, nos waîtans d' raploûre saquants-èfants po fièster l' Walonîye ! Nos-avans d'mandé aus scolîs dèl sicole sinte Marîye di Swârléye di nos dîre one pitite saqwè. Lès-èfants, c'è-st-à vos-ôtes !

1. Si n's-èstans véci, tortos èchone, audjoûrdu, c'èst grâce à nos tayons èt à nos ratayons. Nos pârins, nos mârines èt leûs vîs parints, il ont fait l' guêre èt mwints côps d'né leû vîye po qu' nos fuchanche libes. Nè l' rovians nin !

2. Asteûre, waîtans pus lon avou vos-ôtes tortos èt avou tos l's-èfants èt tos lès djon.nes. C'è-st-à nos-ôtes di sondjî à pus taurd èt à bâti on-avenîr di paîs po nos r'trover, po todi, véci aus fièsses di Walonîye! Qui n's-avans bon d'yèsse véci !

3. Nos-èstans fiérs d'yèsse Walons, nos-èstans fiérs d'yèsse Namurwès, nos-èstans fiérs d'yèsse Bèljes, nos-èstans fiérs di fé pârtîye dèl grande famille qui boute po bâti l' mèyeû dèès mondes.

Timps dèl mèsse, nos sondjerans à deûs soçons do Comité Central qu'ont disparètu branmint trop timpe ! Marc Ceuppens èt Charles Massaux, nosse grand Châle, qu'aveûve li mèyeû dèès r'mèdes conte li neûrasténîye : causer è walon ! Nos f'rans èto one pitite clignète à l'abbé Dardenne

qu'èsteûve sovint asto d' Paul Malherbe po lès mèsse di Walonîye : on-ome qu'on n' pout nin rovî s' sorîre èt s' bonté po lès p'tits qu'on spotche.

Mès djins, dji v' pôreûve co dire branmint d's-afaires po viker nos Fièsses di Walonîye dins ç' qu'èlle ont d' pus bia. Maîs dj'è veu d'djà onk ou l'ôte qui soketéye...Adon, dji v' sowaîte on bon londi dès Namurwès, on londi qui sèrè on clapant londi après deûs malaujîyès-anéyes. Purdoz bin sogne di vos-ôtes èt à l'anéye qui vint, plaî-st-à Diè.

INTRÉYE :

Li curé : Bin l' bondjoû à tortos, au nom do Pére, do Fi èt do Sint-Esprit !

Tortos : **AMEN !**

Li curé : Qui l' Sègneûr vos veûye voltî èt qu'i vos done si Paîs !

Tortos : **Qu'i fuche bèni asteûre èt todi !**

PÂTÈR A SINT DJAN-BATISSE

Paroles : Alexandre BODART

Musique : Ernest MONTELLIER

Rifrain (Tortos)

C'est l' fièsse di Walonîye

Dissu tos lès visadje

Dins l' Parotche di Sint Djan,

On vwèt dèl binaujeté

On s'asgligne èt on prîye

Ca nos poûjans l' coradje

Po lès mwârts, lès vikants.

Rachonés d'avant l'Auté !

Coplet I

Gn-a rin d'mèyeû qu'on Namurwès

Et rin d'si bia qui s' vî lingadje

Et c'èst po ça qui dins s' patwès,

Sint Djan-Batisse, choûtez s'mèssadje:

Wêyîz tofèr su tos vos frères

Fioz qui l'bonté fuche dins leûs-âmes,

Et dins leûs keûrs, li charité

Qui nos r'chandit di totes sès blames

Coplet II

Vos qu'a sègnî l' Fi do Bon Diè,
Ûchîz todi au fond d' vosse chèle
Dèl bènite aîwe qui nos spaumerè :
Nos p'tits raupins èt nos bauchèles.
Vos qu'a stî d' soce avou Jèsus,
Avou s' Moman si binin.méye,
Quand nos sèrans po taper djus,
Vos nos f'roz sine: "Véci l'Intréye

Li curé :

*Nos crwèyans qui l' Bon Diè nos vout do bin
à chaque momint qui passe. Portant, i nos-
arive dè l' rovî ou d' fé à nosse môde pus
rade qu'al sène. Ostant dîre qui nos
n'èstans nin todi drwèt dins nos botes.
Douvians nosse keûr au Bon Diè.*

KYRIE

Paroles : Lucien LEONARD

Musique : Ernest MONTELLIER

1. Sègneûr, Vos avoz stî l'sèrviteûr da tortos, pa vosse vîye au mitan d'nos.

Sègneûr, pitié por nos, Sègneûr, pitié por nos... (bis)

2. Ô Cris, vos avoz vlu prinde li dêrène place, pa vosse mwârt dis-su l'crwès

Ô Cris, pitié por nos, Ô Cris, pitié por nos...(bis)

3. Sègneûr, Vos vèyoze voltî lès èfants lès p'tits, Pa vosse glwêre qu'è-st-au ciél.

Sègneûr, pitié por nos, Sègneûr, pitié por nos...(bis)

Li curé :

Li bon Diè n'èst nin come on juje qui nos vout condâner, mins come on Père qui nos veut voltî. Qu'il nos douve sès brès èt eûche pitié d'nos! Qu'il nos pârdone tos nos pètchis èt qu'il nos tègne dilé Li po todi.

Tortos : « Amen »

Tchantans bin fwârt si bonté èt s'grandeû !

GLORIA

Glwère au Bon Diè jusq'au cièl, Pais aux omes di bone volontè

PRÎYÉRE PO C'MINCÎ

LÈCTURE

On bokèt dèl lète da saint Djâque

Mès frés, vos-ôtes, si vos vikoz tortos dins l' fwè da nosse Sègneûr, vos n' p'loz pont fé d' difèrinces ètur lès djins.

Suppôsans qu'one djin fwârt ritche, avou d's-anias d'ôr à sès dwègts èt moussîye come on prince, intère quand v's-èstoz tortos rachonés. Maîs, ossi rade, on-ome sins caurs, qu'èst mau stitchî èt agayolé come on rôlèû, intère èto.

Vos waïtoz do costé do cia qu'èst bin mètu èt lî dîre :

- 'Vinoz, ô Maïsse ! Vinoz v's-achîre véci, c'èst l' pus bèle place ! »


Èt au cia qu'èst pôve, vos lî d'djoz :

- 'Twè, ti pous bin d'mèrer d'astampé !
» oudobin : « Achîd' tu vélà su l' plantchî, à costé di m' tchèyêre ! »

Si v'avez fait ça, vos-avez fait l' difèrence ètûr lès deûs. Vos-avez mau jujé lès djins ! »
Choûtoz bin, mès frés ! Li Bon Diè, li, i vout d'ner s' Rwèyaume à tos lès cias qu'i veut voltî. Èt c'èst zèls, lès pôves, què l'auront l' paurt d'èritance.

MEDITATION

CHORAL (T.HUGGEN).



Alléluia !
Causez, Sègneûr : vos djins
sont là
po choûter vosse mèssadje.
Alléluia !

On bokèt dèl l' Bone Novèle d'après ç' qui sint Luc a scrît :

Di cès trévints-là, Jésus raconteûve à sès dissipés : « On maïsse, qu'estêuve on pèsant, aveûve on jèrant qui n'esteûve nin fwârt fiauve. Il a stî racusé pace qu'il aveûve dispinsé one masse di liârds. Si maïsse l'a fait v'nu èt lî dîre : « Qu'est-ç' qui dj'aprint, là, mon parent ? Alez, rindoz compte di voste ovradge èt dji vos l' di platèzak, vos n' sèroz pus là à paurti di d'mwin. »

Li jèrant sondje à li-minme : « Qu'est-ç' qui dj' va div'nu, don, mi ? Aler travayî l' tête ? Dji n'a nin l' fwace. Briber ? Ci sèreûve on-afront. Dji sé bin, asteûre, çu qu' dji m' va fé po qu'on côp qu' dj'aurè stî revôyî, i-gn-eûche co dès djins po m' ricîre comufaut ». I fait v'nu onk après l'ôte lès cias qui d'vin.n' payî one saqwè à s' maïsse.

Au prumî, i lî d'mande :

- « Combin d' tonias d'ôle vos faut-i payî, vos ? »
- « On cint ! »
- « È bin, achîdoz-v' èt scrîjoz su l' bon : cinquante ! »

On deûzynme si présente èto :

- « Qu'avoz à rinde, ô vos ? »
- « Cint satchs di frumint ! »
- « Alez, scrîjoz rademint quatrè-vints ! »

Vos n' mi crwèroz quéquefiye nin, mins l' maïsse a dit branmint do bin di ç't-ome-là, qu'èsteûve on vaurin. Douvint ? Il aveûve montré di qwè-ç' qu'il èsteûve capâbe. Come d'èfèt, lès fis di ç' monde-ci si mostèrenut branmint pus toûrsiveûs qu' lès fis dèl lumière. »

Choûtoz bin, di-st-i nosse Sègneûr : « Li cia qu'èst fiauve dins one tote pitite afaïre, il èst capâbe èto d' rèyussi tot ç' qu'il ètèrprind. Mins l' cia qu' a montré qu' 'l èsteûve on poûri dins one pitite afaïre, li, i l' sèrè èto dins one pus grande.

On vaurlet ni pout sièrvu deûs maïsses : oudobin i vièrè èvi l' prumî èt i vièrè voltî l'ôte ; oudobin i s' alôyerè au prumî èt il èvôyerè l'ôte aus sèt' cints diâles.

On n' pout nin sièrvu deûs maïsses : li Bon Diè èt lès caurs.

PRÉTCHÉMINT

CRÉDO

RIFRIN N°1

Dji crwè qui Diè èst Pére, Amoûr èt Vèrité

LÎJEÛS (Lecteur)

Dji crwè au Bon Diè qu'a tos lès pouvwêrs
Èt qu'a fait l' ciél èt l' tète.

Dji crwè à s' Seûl Fi, Jèsus-Cri, Nosse
Sègneûr,

L'Efant Diè fait Ome pa l' grâce do Sint-
Esprit,

Qu'a tchwèsi l' Vièrje Mariye po ièsse si
moman.

RIFRIN N° 2

Dji crwè au Seûl Sauveûr, Jèsus, li Fi do
Père.

LÎJEÛS

Condâné pa Pilate, Il a stî clawè su l' crwès,
Èst mwârt èt a stî èssèv'li,

A d'chindû aus-infiêrs.

Li trwèzyin.me djoû, est raviké dès mwârts,
Èst monté au ciél po s'assîre à l' drwète do
Père,

Po juer lès vicants èt lès mwârts.

RIFRIN N° 3

Dji crwè à l'Sinte Eglîje, vicante pa l'Esprit.

LÎJEÛS

Dji crwè au Sint Esprit,

À l'Sinte Eglîje catolique,

Èt à l' comunion dès Sints.

Dji crwè qu' nos pètchis nos sèront r'mètus,

Dji crwè à l' rèsurècsion èt à l'vîye po todi.

AMEN

RIFRIN N° 4

Dji crwè au seûl Batème, èt à l'Rèsurècsion

INTENCIONS D' PRIYÉRES

Pâter po tortos

Musique : Jean DENISON

Paroles : Henri RASE

« Fioz d' nos, Sègneûr, dès sèmeûs d' Paîs
èt dès mèch'neûs d'amoûr! ».



Po lès mwârts

Air : Prière. Brassens ; F. Jammes

Po lès mwârts qui dwârmèt au fond do l'
cimintière
Ravôtyis dins leûs maus, leûs djôyes èt leûs
miséres,
Lès cis qu'on-z-a conu, lès cis qu'on-z-a
sogni,
Lès cis qu'on vôtrot co r'trouvu à costé d'li
Et po l'ci qu'on-z-ètère èt qu'èst dèdja rovyi

Purdoz-lès dins vosse paradis

Lès cis qu'ont rindu pwin.ne po fé viké l'
manadje
Qu'on ratchi dins leûs mwins po-z-apougni
l'ovradje,
Qui Vos-avoz r'waîti èt qui Vos-ont choutè,
Qui Vos-avoz choyu èt qui n'ont nin r'nictè,
Qu'ont pawartè leû dossèye èt qu'ont todi
rotè **R /**

Po l'grand-mère au culot qui n'avot rin à fè
Qu'à comptè po vosse Mère dès banseléyes
di tchapelèts

Po lès vîyès surales qui n'ont pont yu
d'galant

Et qui s'ont ratrapè quéquefiye en Vos
purdant

Po lès grigneûsès copes qui n'ont pon yu
d'èfant **R /**

Avou l'gros cantonnier qui n'a jamais fwarci
En s'aspoyant su s'choupe po choûté lès
mauvis,

Avou l'grand djârdinî qui Vos frè vosse corti
Avou li p'tit tayeûr po Vos raprôpriyi,

Li cwab'jî èt l'facteûr si Vos 'nn'avez dandji
R /

Et mi qui n'a rin fait qui d' causè po lès-ôtes
Vo-m'-là avou mès mwins trop blankes èt
sins crèvaudes.

S'i Vos faut po l'rawète, on lwagne ou one
cônôye,

Parèt qu' quand on Vos paye, Vos n'rindoz
nin l'manôye

Vos waîterez d' l'ôte costè, quand
dj'ariverai su l'vôye.

Purdoz-lès dins vosse paradis

LI TIMPS D' L'OFRANDE

The Young Verdi (VERDI Ar.T.PARKER)

PREFACE

Li curé : Qui l' Sègneûr fuche avou vos

Tortos : **Qu'! mwin.ne vos pinséyes**

Li curé : Fians monter bin wôt nosse keûr !

Tortos : **Nos l' douvians au Sègneûr**

Li curé : Dijans mèrci au Sègneûr, nosse Bon Diè !

Tortos : **Çà n'èst qui d' jusse èt fwârt bon !**

SANCTUS

Musique : Ernest MONTELLIER

Paroles : Lucien LEONARD

Sint, trwès côps Sint, vosse nom, Sègneûr;

Bon Diè èt grand Maïsse qui v's-èstoz !

Vosse glwère è-st-au ciél èt su l' tête qui v's-avoz faît por nos.

Hôsanna ! Qu'i seûye béni, li ci qui vint au nom do Sègneûr, Hôsanna !

ANAMNESE

Li Curé :

Il èst grand li mistère di nosse fwè

Chorale et assemblée :

Nos annonçans vosse mwârt, Seigneûr
Jésus,
èt nos fièstans vosse tésurècsion,
Nos ratindans qu'vos riv'noche dins vosse
glwère.

*Li curé : Par Li, dins Li, èt avou Li, à vos, Pére
do monde, ni fiyant qu'onk avou l'Sint-
Esprit, tot l'oneûr èt tote li glwère po lès
siékes dès siékes.*

TORTOS : « Amen »

PÂTÊR

Bon Diè, nosse pa di d'là-wôt

Musique E. MONTELLIER

Parole Lucien LEONARD

Bon Diè, nosse Pa di d'là-wôt,
A vosse nom qu'on rinde bon d'vwêr ;
Vègne li djoû qu' vos sèroz Rwè
Et qu' tortos sûront vos lwès
Au cièl èt vèci su l' tête. Mon Diè
Aus-omes chaque djoû dinoz l' pwin ;
Raquitoz nos mariminces, come nos lèvrans
l' pénitince
Aus cias qui n's-ont fait toûrmint ;
Fioz-nos quite di co fè l'mau !

SOWAÎTS D' PAÎS PO TORTOS

Li curé : Èt qui l' paîs do Sègneûr fuche
todi avou vos !

Tortos : **ÈT QU' ÈLE RIMPLICHE VOSSE
KEÛR !**

Li curé : Eûchans tortos on jèsse di paîs
po l's-ôtes !

Musique de l'organiste

AGNA DO BON DIÈ

Musique : Ernest MONTELLIER

Paroles : Lucien LEONARD

Jèsus Cris, Vos, l' Fi do Bon Diè
Qu'a pris l' dosséye di nos pètchis, pitié por
nos !

Jèsus Cris, Vos, l' Fi do Bon Diè
Qu'a pris l' dosséye di nos pètchis, pitié por
nos !

Jèsus Cris, Vos, l' Fi do Bon Diè
Qu'a pris l' dosséye di nos pètchis, donez-
nos l'paîs

COMUNION

NESSUN DORMA

(G.PUCCINI Ar.BERNAERTS)

BIN EÛREÛX

A. LALOUX / L. LEONARD

E. MONTELLIER

Rifrin :

Bin eûreûs lès cis qu'on stî à l' tauve do
Sègnêur

**On p'tit bokèt do prêtchemint da René
Dardenne po l' mèsse do Grand Feu d'
Boudje è 1987.**

Cite anéye-là, lès travaus po noste èglîje
Sint Leup, lès Namurwès n'è vèyin.n' nin l'
difin maïs on v'neûve di douviè li Resto do
keûr, au plin mitan do vî Nameur !

C'è-st-on drole di prêtchemint qu'il a dit ç'
djoû-là, nosse René. On prêtchemint qu'est
pus rade on sondje. René è-st-au paradis !
Èt il ètind l' bon Diè qui cause avou Djôsèf
èt Françwès. Choûtez ! « *Djôsèf èt
Françwès, vos p'loz dischinde fé on p'tit
toûr su l' tête maïs seûlemint avou sint
Matèrne, pace qui, minme è Paradis, dji n'
mi fîye nin trop fwârt à vos-ôtes deûs. Maïs,
auwe ! lès péres, n'èst nin rèquis d' vos fé*

r'mârquer, don ! Maîs dji v' vôleûve dimander on p'tit sèrvice. Dj'a mètu trwès quèstions su on papî. Vos lès lîroz quand v' sèroz arivés èt dji ratind lès rèsponses ! »

Èt v'là nos trwès compéres arivés à Nameur. I c'mincenut pas l'èvèché où ç' qui Monsègneûr Mathen lès r'çût avou on bon p'tit vêre di pèkèt. Binaujes, nosse Djôsèf èt nosse Françwès minme si sint Materne fait d'd'jà one laïde mawe. L'èvèque lèzî done lès « *Béatitudes* » rimètuwes è walon, c'èst ç' qui Jésus aveûve dimandé !

Po rèsponde al deûzyinme quèstion, i n' faleûve nin couru lon èri. C'èsteûve èmon l' curé d' Sint Djan, Paul Malherbe. Vos l' con'choz bin, don, li cia qui prêtche è walon po lès Fièsses di Walonîye !

Li èto, i r'cît nos trwès-apôtes avou do blanc pèkèt. « Ça continûwe fwârt, sondje-t-i sint Matèrne ! *Dji vos l' di tot d' chûte : si vos v'noz véci po-z-aler veûy l'èglîje Sint Leup, vos dîroz au Gand Maîsse qui ç' n'èst nin co po d'mwin ! Vèyoz, dj'a scrît à dès minisses, dj'a minme rèscontré l' gouverneûr Lacroix (ètur nos-ôtes, i m'a quausu dit : Si c'èst po tot d' chûte, vos p'loz bin fé la croix...*

*mande èscuse, one crwès d'èssu. I passerè
co brammint d' l'êwe dizo l' pont d' Djambe,
savoz !*

— *Nos n'avans nin v'nu po ça, di-st-i Djôsèf.*

— *Â bon..., rèspond-i Paul Malherbe.*

— *Vos savoz bin, nos-ôtes èt lès-èglîjes...,*
di-st-i Françwès, maîs parèt qu'i-gn-a dins
vosse parotche, èl reuwe Sint Leup, on
novia rèstaurant. Li Resto du Cœur, qu'on l'
lome. Èt Jésus si d'mande qwè. Èst-ç'
qu'on-z-î mougne bin ?

Nosse Paul Malherbe lî rèspond platèzak :
*Dji n' pinse nin qu' sint Matèrne, avou sès
bias mousseints, î sèrè bin r'cî ; i
d'meûrerè avou m' moman : èle fait dès-
avisances qui dji n' vos di qu'ça. Maîs vos-
ôtes, Djôsèf èt Françwès, dji m' vos-î va
mwinrner. Sint Matèrne n'a rin wasu dîre
maîs i n'èst nin tranquile di veûy Djôsèf èt
Françwès 'nn'aler sins li !*

Saquants-ascauchîyes pus lon, Paul Malherbe lèzî èsplique : *Vèyoz, véci, on fait ç' qu'on pout. Vos dîroz à Jésus qui c'èst come do timps qu'i vikeûve su l' tête : dès djins qu'ont frèd, dès djins qu'ont fwim. Dès pôves, i-gn-a co todi èt minme brâmint asteûre. Èt dès rèstos do keûr, c'èst bin maîs i-gn-a co bramint d's-ôtès-afaires à fé po soladjî lès miséres. Li charité, c'èst fwât bin maîs i n' faureûve nin rovi l' justice don !*

BONE NOTRE-DAME

Paroles : Joseph CALOZET

Musique : Ernest MONTELLIER (Orgue)

Bone Notre-Dame, aus grands djoûs d'
fièsse,
Lès Namurwès fèyenut l' min.me djèsse
En ralumant vos p'tits-autés,
Come li cia do Bon Diè d'Pitié.

Bone Notre-Dame, dispeûy l' Maursale
Jusqu'à l' Sarasse, totes vos potales
On lès gârnit d' fleurs èt d' lampions
Po fé tok'tér lès keûrs walons.

Nameur vos confîye sès miséres
Et vos choûtez totes lès priyéres
Qu'on sème pa tchap'lèts su l' Boul'vârd
Divant vosse tchapèle dès Rempârts.

Aus djoûs dès fièsses di Walonîye,
Bone Notre-Dame, nosse coeûr vos prîye
Di bèni Nameur qui vos r'dit :
Èmon nos-ôtes on v' vwèt voltî !

BÈNÈDICSION

Li curé : Qui l' Sègneûr fuche avou vos !

Tortos : **ÈT QU'I MWIN.NE VOS PINSÉYES !**

Li curé : Fuchoz bèni do Bon Diè, li Pére, li
Fi èt l' Sint-Esprit !

Tortos : **AMEN !**

Sonnerie « Aux Champs »

LA BRABANCONNE

F. Van Campenhout, arr. A. Crepin

Noble Belgique, ô Mère chérie,
A toi nos cœurs, à toi nos bras ;
A toi notre sang, ô Patrie,
Nous le jurons tous, tu vivras !
Tu vivras toujours grande et belle,
Et ton invincible unité
Aura pour devise immortelle :
Le Roi, la Loi, la Liberté,
Aura pour devise immortelle :
Le Roi, la Loi, la Liberté,
Le Roi, la Loi, la Liberté,
Le Roi, la Loi, la Liberté.

LI BIA BOUQUET da Nicolas BOSRET

**C'est d'mwin li djoû di m' mariadje,
Aprêtez, aprêtez tos vos bouquêts.
Vos lès mêtroz au cwârsadje,
Dès bauchèles do banquet.
Mins c'èst l' mène li pus djolîye :
Ossi, vraîmint dji m'rafîye
Dè li donèr li bouquêt
Èlle aurè li bia bouquêt.**

Ç' a stî one saqwè d' drole.
L'ôte fîye dj'aveûve one crole.
Tot-aspouyî,
Dj'aleûve sokî,
L'amoûr vint m' rêwèyî.

C'èsteûve mi p'tite Marîye
Come èlle èsteûve djolîye.
Quèn-embaras
Ç'a stî ç' djoû-là
Qui dj'a signé l' contrat.

Adiè totes mès folîyes
Dj'intère dins l' confrérîye
Ç'è-st-à l'auté
Qui dj' va djurer
Amoûr, fidélité.

C'èst d'mwin qu'dji m' boute à pièce
Adiè tote li djon.nesse
Po comincî,
Dji m' va satchî
Al cwade à tot spiyî

Avec le soutien de



**NAMUR
CAPITALE**

Bouké



**Comité
Central
Wallonie**

Retrouvez-nous sur :

www.fetesdewallonie.be



Comité Central de Wallonie - ASBL

Rue des Brasseurs 148 - 5000 NAMUR

Tel. : +32 (0) 81 222 999

ccw@skynet.be